



~ 10
2842
4



門 16
號 2842
卷 4

堵文忠公集卷八

辭章

宜興堵允錫仲緘著

權使八箴

一約已

受權者以羶腴爲念則所求於權必奢居心不淨飭行不
精侈物濫度有自來也士君子約一分服御卽減一分願
望寬一分物力卽省一分誅求儉足養廉廉以養德此爲
喫緊予嘗語人云某四十年窮男子蔬布僅給一旦黃白
滿笥歸耀閭里盡改生平別新面目此最不祥事雖遭歲

早稻田大學圖書館
25.5.20
借

凶課額虧少旁觀戚戚余視固然報政之日露豪風袖親
朋妻孥且懷怨謫予顧而樂之爲小詠曰烏冠新戴舊書
生擁蓋從官父老榮釋擔歸來人共識負薪重有踏歌行
予且終身弗諼第以處權已乎
芻豢盈前適口則美及其既飽糟糠同視百襲吳綾千純
越綺身衣之餘委牀擲几將安用之垢穢叢已云以養身
穢斯集焉我解其穢於養則全四顧蕭索彌復灑然爰著
箴辭矢之勿諼

一郵商

商稅舊額二萬今且七倍矣當事者請自三思不天降不
鬼輸此孰非派在商者困在民乎盡法征之不敢怨又從
而毛瘕之於心何忍今者商敝極矣而司計之心猶嗛嗛
議派未便釋然夫與其議增苛商以趨功令何如議減受
舉以恤時艱保障繭絲優劣具在雖無其力不可不時切
乃心願當事君子推而廣之苟能損少而全多則一時之
虧盈非所計也

古之征商以禁逐末今雖欲耕賦重稅迫去爲商賈名肥
身瘠從而苛之此得彼失彼持什百取其錙銖以此而觀

彼若有餘亦從彼慮利鮮患多錙銖而外彼贏幾何商困極矣是用作歌

極矣是用作歌

攷舊制漏稅者貨半沒官蓋國初立法之始固應嚴以示防然而風俗淳茂亦鮮犯者不過與畫地解網同條今民窮課重人心不古偷漏之路百歧千錯日無虛刻使一以古法按之不過旬日間而窮民之命可一網盡也先事君子改沒貨為罰價意在斯乎某受事之始更減罰稅小者依稅加數倍或釋不問重不過五倍守關員役緝多不加

功少亦不罪也或憂予虧額莫不曰罰輕漏多人亦易犯予曰小民負販貧稅數分一旦在官貲已失半更加誅乎且闕役非予親愛子弟也賣放之餘以邀功耳苛罰適為叢驅何濟或曰虧正供以市恩如井仁何惻然曰寬民受禍一家哭也剝民自救一路哭也天不保善予身徇焉固其所也倘邀如天之福輸解弗後此紛紛偷漏者皆朝廷之良民與外府也天地之利在官者官在民者民豈不甚快予罟之為中飽乎

蘇軾備荒求弛鹽禁曰虧歲額二萬而僅捐此二萬彼不

增文忠公集卷八
三
爲盜爲利已多他復何較讀是快語如癢得爬推而行之
以寬民瘼

司權無訟詞之訊刑似可弛也然薄俗多偷衙役兇奸昇
夫逋掛不加鞭撲雖良吏不能爲理然或鼓舞之無力一
旦致期或防慮之不先坐投阱網禁令旣煩撈掠是繼至
有以撈夾爲鼓吹者噫甚矣朝廷設權惟利是求權臣稱
職惟歛是能旣不講於有譏不征之古又相習爲刑亂用
重之條孰非血骨肢彼膏髓試問尊如帝狼如虎賤如菅

者爲官乎爲私乎當亦猛然汗也苟能上慎其法勉下以
誠上下不偷詿誤逋漏亦覺自少必待鞭敲之力然後示
儆不其晚哉諺云跟很官趁硬錢則怨歸於上弊窟於下
非權善算也予嘗曰能爲小民蠲得一分如拔夏蠟一刺
好爲小民緩得一日如放重囚一眠雖知無益此心覺自
快利也

哀哉生民不計其後刑將及之畏如窮獸寧不爾矜曾莫
爾救爾啞而呼我怒而娛怒娛破頤啞呼破膚若彼鹿走
其命懸厨每念斯言我心瞿瞿戒之用先董之以蒲

一執法
各衙門之弊莫不由於散法徇情權關爲甚既無地方之任於權也客使耳復無歲月之淹於權也傳舍耳持是意也以往情面於是乎生夫去政之苛莫先剔蠹牙蠹務蠹包蠹脚蠹一時巨豪大俠不有以去政焉得清執法從威赦過從簡得罪按之當法而止夫何得私又孰從而苛之也哉法者官法情者私情士君子既出身加民不味做官兩字只想做私觚之不觚可爲三歎
人有恒言曰爾做官做非悠忽官絕私歡彼不做者日馳

月駛做而非者意縱法馳官無高卑惟官是知做無賢愚惟做是思凡百君子視此箴辭

一敬事

敬事後食古之良訓北新較諸權獨繁較府縣頗簡然亦有煩於府縣者府縣之煩今可待後數日之積一日可辦權部商稽課商日有程課日有額一刻高臥百夫負擔半日公借百貨露積煩而最專且久惟北關獨也必宜昧日而興及晡而罷案牘決遣不稽晷刻非大慶賀不數入省鄉紳過客以誠告之不數宴會苟有其勞博逸之半亦不

辭為況千夫稱便一人雖勞勞少逸多豈不快乎

彼晏而居者高臥一朝嬉遊一夕此擔而倚者誤途一程
耗貲一日彼晏而居者一此擔而倚者百惟民趨利所爭
夙晚妻孥待望期而返關以征之復以稽之失利既閔
得利亦遲念彼民生以勸官規

權部商稽旬部字
下似脫去一征字

一砥節

古稱上交不諂下交不瀆又云不可奪節不可奪志士君
子際時艱危受主職守必先有卓然自立者在否則容容
苟苟清夜不可問心大廷何以涖衆權使於分符為最卑

然而苟有其恥具可弗辱豈必承人色笑以固身名予自
受事津頭凡可為商民請命者侃侃陳乞無少回護有所
釐創不畏權豪部院紳賢亦共諒予慙他若權燄當前秉
禮自持公會之外未嘗私謁旁觀者雖為予危之而究亦
莫我加也由是觀之士君子立身居官禍福當以天自信
曰旦日明日鑒不遠媚與與竈又何益乎嗟乎君子之節
女人之身一失不收思之惕息

丈夫立身世義命懸光辰禍福當剝復七尺那足論孤陽
邁其九溝壑志所存當其大節扶屹完回崑崙豈同血肉

夫患樂謀餘生抱石豈不厲茹蓼豈不辛中夜耿清況起
視新河明卓哉千古身虧全屬天親

一搗謙

予性耿率絕無回護然而此中鄙慳每切自知愧畏之懷
不敢越假或時侍名賢聆碩論輒素心向往寢食不諼友
朋規諷終身佩之一事小錯時對臧獲如負芒刺不能安
也雖於謙六之義未聞而庸質所基實安於下百爾君子
無我棄尤誨之話言所厚期耳
莫高匪山去天尺五莫尊匪王依於下土我獨何心傲焉

自警載顧之鳥載顧之僂靡不有年各視爾祖鼓不更中
日不再午作箴者誰義興堵子

周補翁暨王太夫人八十雙壽古言并序

古之所爲大壽無他術也積之有本因乎自然惟修德力行保身而已吾鄉補翁先生德行文章見推當世與予先子同遊序稱益者交余總角卽傾慕先生孝友天植氣宇安恬獎掖後生更端靡倦以子衿負盛名者二十餘年而艱於一第先生不以爲歉課其長君成進士歷官於閩政績日彰謙和豈弟施澤於人悉如先生教仲與季相繼爲譽髦諸孫森森羣戲庭下王太夫人笄而從翁六十年執婦道如一日先生有田以自給有聲以自重垂老而童不

增文忠公集 卷八
黼而華今日臻康壽矣豈假術於服食呼吸者哉余向分
席於先生長孫穎秀有祖父風使長君之後更得長君則
長君所不及祝於先生者且繩此無窮矣先生雖大年而
起居飲食不替恒時王太夫人從容朝夕大德必壽亶其
然乎予捧筭甚歡因小吟以佐先生色笑
采芝兮高岡白玉兮君堂日燦燦兮丹霞紛綸兮衆香攜
余筇兮何時迢遞兮徐行鼓桂楫兮中流結紱佩兮蘭芳
玄鶴兮共鳴古桃實兮新陽永言願兮渥丹齊日月兮久
長

贈貞復史翁先生清溪行并序

余里貞復史先生余友吾往大兄尊人也初吾往祖心巖
先生以師道尊於世名公由其門者一時輩出雅知人然
不輕題題輒不爽獨異於予命吾往以雁行視余余因自
負通孔李與先生祖父孫三輩率忘年忘形而友今吾往
又得五子其伯仲卽年少藝成俊爽玉立時問字於予予
甚矜之屈指二十五年間論交四世矣交之耐且篤如此
不易得也心巖先生碩德令名享大年不疾考終父老傳
爲瑞事先生老學不倦恬於榮利醅懇樂易童叟皆暱愛

之然外和中介心嚴先生門固多長者車其執幣稱弟子
禮者皆先生故舊也先生厭苦之將命者辭不得輒閉戶
入云則入自謂過矣食云則食得未曾有先生與予又丈
人行予卽聞望淺鄙不及前賢乎然亦遂戴進賢冠若以
恒法見加望望然予安敢得及乃先生特爲予寬一格至
卽引見慙慙勞苦如平時又炊屨烹鷓絃歌響答翦燈達
曙以勸客予又謂先生固卒和非終介者也心嚴先生之
知予也則曰孺子可教非長貧賤者先生之知予也則又
曰孺子足多可長貧賤者予之生平底裏安能出兩先生

度內哉先生年七十餘骨髮不衰子孫皆大賢鶴立鳳翽
皆意中事五福所自有不足爲先生頌獨先生宅於溪之
涯溪流清每蒲葦雜映時與先生臨流詠觴顧而樂之因
作清溪行以賦其盛

西溪之東東溪東間有先生稱溪翁水盤映座二千頃翠
嶂開門三百重東風昨夜漲溪雨出看流水臨溪住桃花
正開客正來呼童翦燭供雞黍高拂琴牀深酌酒把酒聽
音得心手今翁七十好鬚眉與翁四代一作世作朋友赤松
燁燁丹芝靈上有蜿蜒蒼龍鱗先生家藏丹芝上有龍首
鱗角爪鬚天成蜿蜒刻繪

之所何如醉飽于春樂坐酌清溪萬古心

全集卷八終

邑後學

徐澤霖中甫重校

堵文忠公集卷九

詩集

宜興堵允錫仲緘著

耐可吟

公分巡時訂生平所為詩共一百四十九首曰耐可

吟今編次仍舊

感遇

古木生高原返景清光入曠野無一助寒暑見榮特蒼皮
剝蘚露森陰涼蘿月翠律風雨欽恂悅鬼神格以茲老柯
幹應有奇胸骨危立神不怡念子令人惻

其二

田父倚陌立悠然懷遠悲兼旬黃埃風作意方爲災去歲
種嘉禾今歲耘新來刈漑非易力主伯皆良才天意不歡
農枯之使榮萊晨興聽鳴禽種插蓄畬開驅牛出東籬牛
步中徘徊豈敢憚勞苦君事應難爲太息服先疇食舊胡
忍違努力牛勿言忍飢營新炊

其三

燕燕梁間飛霍霍元其翼啣我田中泥啄我田中食依我
立門戶哺乳良生息美人捲簾坐時晏中懷切所思在千

里隱憂非朝夕下上乘風輕呢喃好其舌只解人意歡那
知人意戚

其四

開軒見喬松習習山風裏拂石張琴牀匡坐成孤對慮默
籟以清冷然落礪水盡日有餘音不彈還自理

其五

乘帆下瀚海一葉浮元溟長風揚波光轉睫千里奔縱往
意何極直欲凌霄辰須臾地天沒黑浪傾昆侖蜃魚恣奇
詭鼓鬣掀朱唇神摧氣色弱抱岸如抱親歸來見漁父明

月蘆花津

其六

抱甕朝行汲力弱井泉深繫綆轉轆轤汨汨相助勤植柳
供甜息意愜缶以盈驅車下長道黑汗流飛塵雜沓向我
拱瓢杓解我辛一吸張喉吻再吸掀胸襟三吸仰天息習
習涼風生羣喜我亦去攜半歸囊飧學問貴有源萬類資
泓清

其七

客從遠道來贈我一隻荆取之理晨櫛櫛拙志所存佩言

生氣誼外澤內以貞骨臞君共久華髮我生新於間歷風
雨終始堪一論朝炊知我飢夜枕知我辛荆簪知我髮故
人知我心

其八

林木蒸紛霧朝來濟南山頃之爲白雲天繚空蒼間信彼
長風吹時共飛鳥還杳從太虛入目曠神亦閒由之悟長
生物理貴自然

其九

有鳥下北渚皜皜鮮其儀愛此渚中蒲孤鳴石上磯相彼

梁閒鷺啄月豈不肥所生貴尊性拙食甯遂非願言矯長
翻正與秋空期懷哉報印友修路無相違

其十

南山有喬松下有千年藥欲來阻重修道里不可約向客
恭問詢遺我黃金勺取以挹苓醕能使心神豁鳥鳴山樹
空雲長石苔滑望望行復迷芒鞋那得著

其十一

燒原出北郭鳴稍帶寶刀朔氣日色寒飢獸羣呼招下坂
豕心滑脫草兔足驍圍合乃鋌險乘夜思攻逃少年競奏

巧氣盛霍嫖姚奔足塵飛屯搯臂矢集毛罷殺獸亦散夾
道譁金饒驅馬獨言歸落旆蒼風蕭彎弓惜不發留待雲

中鵬

己卯仲春同方坦菴陳雲韓實菴小集如園步賦實

菴將字

一庭香雨溼羣芳攬勝欣逢佩履將魚喜親人窺影躍花
能不語倚情妝主人有竹可留客清侶論觴合許狂秉燭
佐游期勿負莫憐良夜幾人長

舟泊嶧湖夜雨

病兼作客復當秋況繫蒼茫萬頃舟破夜斷鴻寒入塞浮
空陰雨氣乘流捫衾醒我三更酒伏夢歸予千里遊不負
天涯馮說劍牀頭猶是壯於頄

甲歲北歸過柳堤得黃字

馮遊爲業酒爲鄉醉踏風埃極目黃自覺赤貧翻意適莫
歌白雪與時傷諫予往者匏如石追得來茲鬢已蒼試傍
柳陰成小憩等閒春盡馬蹏忙

聞警

除職北征瞻天非遠忽聞虜警備睹雁鴻繪鄭俠

之幅實長請終軍之纓恨短出車於牧彼何人斯
愴事警懷漫言賦志

驅車塵中道我生逢聖明肄雅感初期大義明朝暎霜嚴
樹色薄計日行邈迤書生識分迂顧影論生平不畏一夕
死所願矢朝聞自許默自難河水悠悠津詎意歌行路歧
道迴雙輪三軍失漢律萬里聞胡腥笳鼓捲地來士女如
天傾曠夜號中野徹曉無迴聲去年遭此夕已分溝中塵
百苦幸一還颯栗驚餘魂長兒充城卒戰血爲孤燐長婦
他適從淒鳴提我孫所喜次兒猶避役遷河陰有女秀且

長割肉賣筐繒賣繒莫自惜官府正逋征幼兒無知識乳
哺爲癡嗔今夕如去年昔健今彌伶幾番寘路傍咽咽涕
以吞我行三日夕愕顧無知親竄首幸在支凍骨安所論
愴哉天降戕朔風動妖氛天子輟食歎智勇相紛紜昔年
韓白家顧面聲爲噤惟聞司馬令清野堅孤城苟冀旦夕
完安識道路辛再聞急徵召羽檄稱於勤頡頏各有故奔
赴無兼程麾下健武卒命重法日輕挺刃晝入市醉宿倡
家邨溥天率臣土憂樂敢弗均西北苦刀瘡東南苦賦更
曠澆中原中白路無行人眞成民命賤甯望天心矜草莽

泣當路晨氣懷孤清張目擬萬言瀝血願一陳天子動顏
色優詔前孤臣顧其更事淺那得託根深幾見古人書今
措之施行不然爲牧吏分麾出燕雲北邊正思帥爲君聞
鼓音太倉百萬粟晨發無留困苟起百姓色甯憂御史文
慷慨千秋思低徊塞上吟不然使絕域仗節揚皇靈抗聲
醜虜中稽首厥若崩片言折衝師格獸如孚豚不然承一
校涕誓當前屯百年今一戰背裂鬚如鍼殺虜不殺降聽
鼓無聽金乾坤扶正氣草木揚奇兵冒雪夜渡遼披石朝
勒銘所恨軀力微一劍安足任不然爲義士喋血中虜廷

甘陳豈殊異膽血橫腰身廿載稽天誅一朝伏漢刑於說
苟有濟凡命皆君恩賚志莫適從仰面徒淫淫徒泣豈自
憐隱痛迫中誠安得萬仞戈寘之河漢濱一揮斂妖翳再
揮昭光辰退遂羝在藩鼓楫慙初盟中夜起浩歌載溺無
胥淪肉食者天衢區區君莫聽

聞雁

旅雁初南渡征夫頻北催衝風霜下白唳月夜聞哀萬里
客心勁兼旬馬面灰相看歧路裏同是故鄉來

訪友

流水疏楊徑重過慰昔期共聽通夕話相盡十升卮千里
遊仍劍孤懷送有詩人生幾良晤涼月四更遲

舟次懷人

西風客路自禁支迂目林蒼覓所思喜不醉人村市酒苦
難成句意中詩不窮名理山窺牖亦有良朋鳥悅枝千古
論心誰與共伊人空溯水清漪

三衢寄徐友園小集

偶過林園勝於城得野心尺巒雲外勢流水峽中音聽鳥
涼天夕探花溼路陰豈能攜謝屐聊解一牀琴

陳君應有榻好主又爲徐說劍應無敵開齋只有書秋新
三徑爽月上一庭初秉燭佐清夜茲遊良不虛

同孔浮筠賈錢修韓湛中李愚公年兄集楊汝諧督

府排律十韻

聖主宮中眷將軍架上書聽歌徵下國探策列前缺受爵
應無筭辭名謝子虛語鸚涼牖入曲檻夜星初泡灑調新
火呼箏動雜裾好花相麗并明月故來徐君子賡魚留嘉
賓賦樂胥已相看意氣爲爾復躊躇紉佩期同贈投瓊報

弗如厭厭夜未已湛湛露方潛

長安望月

故鄉月在異鄉明把酒難忘酒後情何處故人來此夕許
多心事入三更短人旅橐朝無焰長我蟲吟夜有聲薄宦
梗浮波影闊莫憐歸思逐潮生

高唐道中

長途短橐奈窮何馬背塵頭撲面訝新雨千畦侵野色驕
陽一樹入陰多蟬嘶折柳逢君曲鳥唱深林喚客過莫畏
熱途名更熱不求聞達也巍科

其二
森森堤柳故垂陰解惜停車遊子心瞻道敢忘如砥志匪
風時切美人音方將奮力無傷昔半老風塵自愧今行路
難逢將進酒一杯聊共此情深

恩縣遇莊年兄賦贈

黃埃白日大堤西愴日驚聽舊鼓鼙路遇酒人真足瑞疇
添黍色可留題中原貴客仍高馬當道何人臥老罷攬轡
逢君應其切舉安反手在三齊

感蟬篇贈夏國山給諫時以直言忤旨

高樹一蟬鳴鼓翼而張吻勞勞徹昏旦皦皦當天日柱腹
無欵迴激氣多廉急念爾軀羽微感爾胸懷切迴言處宵
曠露月風爲骨一枝何所求百爾徒關臆不畏天聽高不
畏人聞密所願抒中誠爲君破緘舌一夕金風來肅氣催
鳴鳩六陰正司令孤陽乃當伏彼蟬豈不智邈哉明以哲
蛻化逝清光藏身在容默危言當明時無負陽和節

出都門承龔忍生過餞寄之以詩

將進酒歌行路難計程今日別長安語君有話應千日贈
我多情只兩看聖主撫髀方任黯軍中屬目正思韓依依

握手期無負南國塵冠許子彈

驅車行

驅牛上坂牛力慳咫尺望岸如望天驅車下坂塵色惡對
面顛風相吞薄上坂下坂行路難千里萬里炎途長人生
所需在升斗苟可以食餬其口胡爲我生將大車日慎一
日生艱虞窘我中懷復陰雨康莊今日爲窪瀦既折我輻
僕以痛隕而號伯徒歛歛安得長楊閒曠地萬頃綠陰成
獨憇寬予辛力解予炎浩歌行遠綿蠻篇驅車登山復涉
水悠悠舉裳者誰子可測不測水淺深欲濟未濟中浮沈

狂夫馮河若暴虎千呼不應公無渡老夫逡巡跪問詢先
策後事遲遲登撫茲一成或一否孰從孰去須叩友吁嗟
乎我生之後今奚如君不見兮行驅車伐輻坎坎甯爲愚
一朝不戒羣揶揄

買妾清江已訂盟矣爲內子所迫勉情遣之遺以數

絕

繡幕簾前一笑綠柔腸許共弱蘿牽老人明月名花簿錯
註緋桃碧樹邊

其二

巢成已許借文鳩
鵲護深枝不自繇
恨殺鴝鶒能怪語
只聽休去不聽留

其三

學繡鴛鴦便繡雙
繡成雙翼不雙腔
詎憐已繡雙心並不
許雙棲傍瑣窗

其四

惱人情是爲情多
簡點離情半客過
情髮已絲憎不韻
喬枝蘿絆奈情何

其五

綦綦光澤照人明
徹底天成是麗卿
未得成恩先薄倖
無端識面一書生

其六

辜負佳人貌已非
春明妝罷試新衣
碧池寄語兼兼鳥
莫羨堂前燕子飛

其七

綠香紅燄疊成綢
映水枝枝似好迷
道是名花偏愛竝
可開三竝錦纏頭

其八

覆井庭梧獨自陰
深閨長夏此時心
料題舊事應含怨
紙薄姻情怨莫深

其九

浦珠解贈客途慙
在煞惺惺細語喃
義重百年輕一諾
探梅庶士可憐三

其十

香薰綵枕若爲求
秋水空庭月色浮
妒美佳人能妒夢
今宵好夢許應不

其十一

七七佳期盼已該
渡河人到鵲橋迴
含情呆煞天孫巧
猶是停梭着意猜

其十二

今生如夢再生賒
不憾東風不戀花
但願柔心同有惜
好尋金屋貯人家

其十三

乍有還疑是珮聲
可將掌上步盈盈
彩雲已謝淒巫峽
猶有襄王暮暮情

長途酷熱因坐小輿
偶憶丙子歲同幽亭
王子讀書

明因寺中時屆隆冬復當深雪兩人篝燈相對淒
清宛然迄思如在清涼國也因彷彿家作觀法以
勝暑威兼憶紀其事

布衾侵骨冷惚惚無計成溫度曉鐘夜色驚棲雞唱早朔
風穿隙鼠音恭竹枝低墜聽階碎窗薄先明覺紙重呵指
披衣庭外望呼童楫楸可能紅

其二

作陣寒飈動色號紛紛疊疊自勞勞照浦影浮珠不夜連
城光耀碧生膏素心瓊女通天屑冰泣鮫人徹夜纈清思

其君同入悟展編坐映一窗濤

其三

酸鼻禁聲擁袖斜客厨無醖酒難賒須深三尺尊吾道益
貴孤調賤里巴臘信占春應作瑞寒枝此夜盡奇葩折梅
對月人如玉大塊文章滿座奢

已卯春季除職北征恭及八公老師行舟於郵湖侍
誨旬日兼同幽亭王子劉子王子諸門兄集老師
舟中紀語

步趨欣有待班席水雲隈吾黨占行兆蒼生注目來蓬心

塢文忠公集 卷九
懇請事師意特憐才莞爾徵開仕吾斯信未能

其二

淮海誰司楫中流愾不禁及門文德聚夫子道容親闔外
須長子當今重虎臣從容晏樽俎鞀鼓莫聽嗔

其三

問強由也侍歸海百川流博爾文章用裁成狂簡收行藏
同水石敦學等方舟大道明師友歸而自可求

其四

人事天心際乘流鼓布帆仙槎朝入漢客劍夜吞櫓觴職

師從政酬功酒列銜嘯歌誠有會師濟一堂咸

飛蝗篇

驅車六月蒙飛蝗浮雲翳日天無光北起汶濟南淮黃不
知其闊千里長下者矯足層巖霜上者鼓翼騰空蒼小如
蛾蝶大倉庚絡繹奔擲相頡頏魃乘早氣驕爲王部分熠
熠羣翱翔剽若風雨屯如山放之六合神而藏縱橫離合
皆調良閃爍變化不可方不集於木不集梁偏集我黍爲
我殃旣剝我葉髮爲槍又翦我穗胥喪亡田父奉裳奔路
傍色嗔氣咽心如狂婦女沓噪都倉皇眈眈已盡歸紅眶

田父跪蝗告我皇食我苗寧食我腸食腸我老死所當食
苗八口爲溝俵去年此地遭新殘千家血肉吞豺狼我存
贅繫豈所望不憚爲復來耕荒耕荒熟那福嘗君來適
扼予之吭君飽欲死予飢僵明年誰爲君耕糧燁燁我役
來周行哀父莫嘯嘯莫傷死虜死蝗等不祥虜乎何厚蝗
何涼命真如菅敢一嘆誰爲天子司陰陽

鄒嶧山中卽句

薜蘿隨處古橋畔自成陰亂石一泉出千山落水聲捫壁
湖清流意脈良可尋徑轉能以變山與人俱深老樹蔭長

夏仰面聽鳴禽睨皖寄所天甯以懷好音山鳥能自悅山
光空照人

其二

石先向我拱何能不丈呼撫膝一危坐恣意將安如不採
南山藥不築南山廬願以偶然會長與幽人俱目曠川壑
翳情親景物疏特此賦行役我生良足愉

其三

勞坐南山樹渴勺南山泉山樹森且涼山泉芬以甘泉水
無窮流樹蔭終日耽濯足寄高枕將無恣我貪物理貴消

息吾道時舒卷暫爾足憇息甯非情所安獨晤無一言四
顧山悠然

其四

翳翳山中霧漠漠山中雲霧霽雲力薄曝我山中行踽步
登岡脊迴視諸峯平山窮天地開極望披前襟礪落滿川
曲樵徑逢漁人疲馬下危坂暮日斜孤邨出山苦不早入
山苦不深徒將出入意亂此空山心

其五

堤轉新流曲山迎古道開雲根自深淺蒸變深山隈小徑

通茆屋中林出衆耒籬果綠蔬隙農家貴土財爽實應秋
令汀華照水來人情先候感何意說三才

臺庄河入舟

釋擔乘流急歸心事屢更蒲浮連岸闊風定覺鷗輕落日
微涼感應秋照水明依舟謀野爨極望浦雲平

風濤夜泊憶路子

深冥孤舟嶼驚濤萬頃驕客情依鷺宿水氣盛蛙器徹夜
聽浮泊虛蓬想寂寥如何憶君子風雨正蕭蕭

渡江阻風投宿青山關帝廟中

終風落日大江波萬里長流一短舸志士感深思擊楫書
生情怯戒馮河依崖自覺山根穩丐火同分佛照多渺渺
愁予悲未濟苦匏須友奈蹉跎

其二

十載皈依弟子門徑來假宿主入恩鼎焚一篆三分恨燈
照千秋不夜魂報帝於今章作漢吞吳久已伏稱孫奮懷
立我中宵懦起聽颯颯江水渾

晚酌

宦籍當茲季身名付酒卮期違全未錯日曠易成詩江白

蒼兼照山空黛影差停橈餘晚興斜月故遲遲

儀真喜禾兼遇里人

新禾漲雨綠柔柔喜入三農盡日穰當午婦筐羣喚叟深
楊豎臥不拴牛近江漁舶風成市賣酒人家水傍樓步擔
逢喧同里話君來此景已全不

環堵蕭齋宜靜日

環堵清齋閒度日當軒古柏欲參天閩二兌謝公
句也已卯孟秋余初任入署仰得此句輾焉一笑
堵余氏也環堵蕭然余素業素心也以余冷腸適

此閒局豈惟人地得配抑若識數使符先賢告我
矣但清字不若蕭字之現成署職雖閒豈宜虛度
居是位者應作靖思因易爲句靜日難虛參天有
待齋前數柏懷睠久之賦古二首見志

堂隙藏小齋畫地成一室虛構紛朝暉曲牖微涼入短策
不及肩草深苔蘚蝕我蕭然資坐此蕭然壁先賢或有
待留句如相識愧生良拙遭於焉成巧合思靜日以長偃
仰增惕息以何能燕處超然邁羣迹以上有燕處超然額未遑良士
瞿有懷聖人惜

當軒古柏欲參天

當軒有古柏植根亦非深所異終始節不同朝暮情離立
寡儔託直榦無繁陰秉志在寒暮風雨幽其貞當其挺榮
特崩另應千尋凡木迺懾伏勁氣通蒼冥豈有他奇骨要
此不渝心佩言以不諛悠哉獲古人

賦載酒載詩載月

壚頭新婦酒架上古人書涼月度清漢幽人坐夜餘森然
四美具擁此專城居放艇蕩微風浩歌馮所如

賦尋山尋水尋花

增文忠公集卷九
山根落清水水畔逢奇花山水流成蹊水花照浮槎但於
行有會忽覺望中賒繫纜循芳洲渺渺思無涯

賦別周子

君訂漁隱我訂樵千里雲山對寂寥槃澗咏歌矢勿告空
崖芻玉永今朝憎茲意氣生殊俗話到窮愁遂慎交身世
與君相痛癢天涯回首共摩搔

登采磯

一葉西風鼓柁聲小將短繖繫荒荆仰天山景看無極動
地濤陰態百更萬里東西吳楚際長流晝夜古今情曠懷

身世殊難我狂問山靈好爲評

其二

馮將老薜絆嵯峨躡步虛無瞰碧波古道怪從天半出孤
帆遠逐霧中過樂詢逸事樵兼史耐解童謳唱雜和倦倚
石屏聊一枕信心歸路不知訛

夢中聞戒語

好色而勿淫好酒而勿酒好貨而勿妄取好施而勿苟與
好剛而能爲理屈好巧而能爲道拙

羈旅而月勉力北征再聞虜騎披猖日迫日盛徘徊

濟水欲濟無從旬日而返舟次感賦

羈臣心在北負擔復南歧分手故人別中懷壯士悲大風
白日昏荒路兼程迷踣蹶旅力薄輾側寒思疑車蓋塵中
來詢面多臞鰲聽語君莫歎反覆倒我彝天高豺犬足百
二無重籬顧瞻咫尺間周道甯如砥不惜淚撲箠中夜重
噓歛

其二

萬物具生命貴者鍾於人黷髮良吻齒悲樂居天心重以
祖宗澤熙洽欣皇仁生聚非易得童白終歲勤詎意天地
覆哭路歡胡羣鞭壯擁婦女屠命如屠豚彎弓廢佃牧摻
獵盈漢民不貴中華肉恣彼強胡吞害氣正司命遡古無
迂陳有倬彼昊天瞻日今之人

其三

士女亂苦麻徹野無雜哭辛苦百年業倉卒成負束丁男
各自去宵露見骨肉老白倚杖隨稚子飢在腹竄身投異
域枕膝嘶窮谷萑苻邁良會白日趨其足朔風刮若刀束
手罹威毒脫虎乃遇狼烏止於誰屋安得大地賤一繪流
民幅

其四

胡虜善用寡一夕千里長王師衆且尊建旆依垣牆兩賢
豈利阨所幸無相妨上方初發繪南國新輸糧急則爲潰
譁暇共相翱翔天心終厭亂虜飽應思颺爲策貴萬全耀
甲鳴朱璫

秋懷

何當白帝臨斗帳闐然陰剩酒醒猶面懷人夢入心亭梧
清月蔭寒蟀語秋深聊作空庭步蕭蕭子夜沈

喜遇遺上人因留宿

行行攜袖拂蒙茸狼籍清陰步履慵望去無涯遊子暮認
來不錯主人逢惺惺覺著迎頭話隱隱能甘入耳鐘愧我
嗔貪成劣久一回清沁老師庸

其二

秋色英英滿地遮歡然如入故人家無煩懸解禪居榻不
事趨迎衲子茶疏四五星參避牖澹朦朧樹遠餘霞倦予
願與知還鳥自在飛鳴溪上葭

舟中和遠夫汪子磨劍得礪字

莽將三尺遠乘風千里孤征水次逢相看擬古今非偶把

似于君誰得雄照浦夜寒噴閣屋衝霄曉映駕天虹雪花
秋水差相得珍重他山好爲礮

榜前一夕賦懷擬劍

霜鏢橫擔二十年抗歌中夜髮支冠久訝望氣人難識茲
慶占光怪已先薦璧不慙希世瑞素緜無改故時管似君
已許君持試敢負生平一割鉛

寄友人

莫吐素羹莫棄布衾莫忘故人素羹味親布衾身溫故人
情新

贈碧松程兄是日立秋

故人憶別復新情蓼遞空香墜晚晴已掛秋帆先夕爽虛
敲酒韻待君成心期藻荇水同徹氣豁雲煙山共明心事
一生誰得許慇懃剪付燭花評

旅葵署客懷

秋風淅瀝下荒除卽次松陰瞰壁疏屈指到來三記月盼
歸期去兩修書索居時事頻懷舊異地雲煙頓感初掃砌
呼童烹夜瀑近江差解渴相如

其二

雨窗無事草侵除近把離騷步較疏千里涼生今夜月四
更夢得故人書踏歌自託狂非昔沸藥生憐病異初旅況
入秋差不寂醉醒馮枕亦悠如

夜眺

何當復夜臨暮雨入邨陰有事皆成昨無襦那自今脫巾
憐慧髮捫面識懼心何處尋鍾耳相聽流水音

富陽夜月

磴通一徑千山月江夾雙帆萬頃風料是詩人吟不就岸
巾歸去鬩兒童

兌次曉行

被衣行驅車微臣畏夙夜氣肅萬象清疏星淡河界江月
迴不流皎皎寒山外遡彼晨光吹層霜入衣帶皦然雞始
鳴聽之良有爲

哭盧司馬

余方釋廬服蹙蹙北征途次聞盧公血戰歿陣除
壇於野爲位而哭之失聲嗚呼公何以死也從古
大任人之自重其生實百倍於庸衆人尤百倍於
小小之諒夫志士也嗚呼然則公何以死方公慷

城文忠公集卷之九
三
慨受命志殲勁敵固非敵死卽公死耳死公是生
敵也夫以兩不俱生之志際萬無一遂之勢徒以
一死謝君父嗚呼豈公心哉雖然設以公之必死
而竟不死也公其遂能無死乎公之死非僅公知
之天下皆知之非僅天下之欲死公者甘心而圖
公速死卽天下之欲生公者亦莫不扼腕而祈公
不如一死嗚呼此安得不哭此安得哭之而不刺
腸指髮也哉遙望嘆血爲挽三章豈予一人私慟
而已

天成許國欲從戎豈羨書生萬里功養士百年今一戰懷
戎三策遽全凶燕頷已矣猶徒壯馬革嗟哉論孰公望望
將軍酣戰處淒風颯栗令人雄

叩馬書生策事強繇來將相不偏良暫飛鐵騎將軍血肯
受金牌廷尉章蹙國空令追召虎拊髀誰爲說馮唐長城
已壞胡兒喜飲馬天河碧落傍

公成一死覆三齊重惜公生輕死非誰爲聖人歌采芑空
令戰士賦無衣中原白骨應留恨一代清流幸有歸公遂
得名胡得志機槍知避將星暉

湖堤快遇方之吳子

信步湖堤岸岸紅晚雲桑葉一時容雁於奇嶺高頭出人
在垂楊深處逢顧笑等閒猶敝綈把看意氣仗雙雄生涯
屈指天涯路慙負一帆江上風

寄友人宋大

虛邪莫浪臨景物入秋陰鮑子知應淺禰生醉越深撫髀
悲近肉戟手說初心去去日愁暮慙歌彼美音

別讖擬古

碎珠而下雀莫不為世尤嗟以不夜光彈之嶙嶙頭雀飛

不可得珠碎不可求赤手看冥冥徒來燕鵙羞歸來歸去
來韞積予藏休

其二

八十遇文壽逾百當其遭際何青年十二相秦十三死奚
用龍鍾肘後懸得意失意莫悲喜壽夭壽長孰後先我今
迨壯不啻耄病至呻吟病退眠甯若富貴來逼人好客主
人須久延先哲有言行樂爾須貴何時當自憐

其三

世人重白璧卞君無屨房世人惜紅顏胡馬嘶漢嬙世好

不可測我術難爲將學短遇長肥遇瘠安在迎時必改妝
窄衫袖子板作腰賤惡從教干楚王

公無渡河

此曲爲朝鮮津卒崔子高妻麗玉所作傷其夫投河而死也

浮浮我舟泛泛我波悠悠我懷公無渡河莫峻匪山莫昊
非天公無渡河莫深匪淵呼公則何公無渡河傷公則那
睇公則多公無渡河公裳偃兮公水漸兮公日晡兮

龍潭肆中

客樓無畔儼然山可喜勞人坐對閒落樹礪泉新有韻八
江磯石古爲顏幾家煙火憑空結出渚漁歌放淺還千里

一官三伏裏莫聽林外鳥閒關

江行得句

渚色平分翠波紋細若縑鳥飛初著樹鷗浴不成沾近水
山容泛遙天霧氣兼寥寥望南國一點野煙尖

定歡詞

父母知我長天地知我誠兩人下階拜一心相共親不願
帛如山不願金如水願我兩心同世生生美貼胸傍儂
坐舒臂挽儂肩兩人同一心怯惻不可言人分南北向心
合東西隨褰衣攬芳枕夕夕神所俚好花憐春光細語惜

長夜其儂儂勿疑爲儂縮羅帶涼月瑩瑩白涼風習習清
同堅不一移兩人如石心涼風習習清涼月瑩瑩白月下
風前人照見心如石

桐江曉發

依約鐘聲遠戍樓空濛曙色隱漁舟亂山孤月清爲夢欹
枕涼蟲氣雜秋繞樹驚鳥慙魏孟懷人暮句賦江洲不禁
支首頻看鈇一曲燕歌越水流

夜泊

疏柳繫孤舟邨居處卽幽披襟聊信步好月適當頭石咽

水聲細雲移山色浮錯將漁父路疑是剡溪游

喜穫

數畝荒邱亦下農秋鎌欣奏一塵庸陰謀露積晴謀曝晝
有廚煙夜有春宿懈老農新意氣苦飢稚子換儀容侈與
昆明商樂事得魚烹試酒初醲

太白詞

千古風流一代豪憬然生氣映江臯神餘奇嶺喬松露氣
吸寒流子夜濤莫主邀賓山月悄有鄰道素楚雲迢於今
屈指誰能醉顧影婆娑愧濁醪

增岳凡湯子山墅
莫笑傾欵段子垣蒔花經雨亦能繁不聞到耳俱爲寂無
慮櫻心自耐喧貫得高陽酣俠客攜來闕里課愚孫久忘
鳳字誰停轍一曲清流自遶門

九松菴漫懷

把手行吟試暮臨八簾細雨賦松陰枰殘默坐空吳越炊
熟閒思自古今忽解復迷雙鳥句無聊猶切一牀心生平
屈指惟狂飲不記挑燈靜夜深

過開平登磯處

破浪雲爲陣依崖石結營風雷天際合草木望中驚不睹
將軍險安知胡虜平猶疑說漂杵神武不煩兵

小集采磯

倚石峯爲障誅蕪地作茵坐恬松自列耳寂鳥來親滿座
皆嘉客馮山是主人開樽饒水陸蔬栗莫言貧

其二

地踞東南勝賓逢郡國賢祇應游子意相賦酒人篇寒浸
浮黃日蒼風度遠天指聽漁父曲欸乃暮歸舷

其三

莫弔興亡古相將木石居曠懷憑一醉已事不勝書荒徑
山空夕暹天月正初詠而應自喜問答伴歸鋤

再過仙霞道中卽句

百道溪光萬仞閒青巒面面照人顏聽無樵徑忽丁樹望
有梵音已隔山碓杵傍泉爭雨急禾田成砌倚雲刪幽奇
堪作勞人贈收拾煙霞千里還

其二

折折昇輿俯壁岫名山解送客隨身記遊屈指六年老撫
勝興思兩度新聽樹豈知聲在壑迴崖始覺影欹人懷音

好鳥如相答爲識風塵舊問津

贈韓穎吳二

之子突睛而燕頤意氣縹若雲無端視我先笑不先語相
逢勿傾平生歡我是天涯之狂客與子未謀言與色丈夫
一揖會有緣寧必相逢盡金石金可爍兮石可戕猗有心
兮不可忘意者於閒有神助人之相知那可量坐子之牀
列子缶我有餘情子有酒羨子談笑皆文章我惟性命託
朋友視子匆匆有行色卽子之樽爲子別千金一死輕於
毛兩人有心不可說

贈祝子子堅生次兒兼命名

聿惟吾與子素心相與堅秋水明蕪葭千金許諾然吾子
如鶩鶴鳴和何翩翩三登子之堂兩聞聲訝覃喜子爲子
飲捧學次且前屬我命以名世世佩勿捐感子義深重薄
德難爲言興懷企古風素絲祝旌干誦詩繹其意綯事厥
有先繇來最小子三百其初篇素以名之志綯以字之賢
論素在吾黨式穀相勉旃尙我生之初古道敦衣冠

八月望夜舟次富江良月如晝不能成寐秉火漫贈

友

秉火獨舟坐頻憶吾子芳彩霞鮮光儀皎雪輝文章其締
此心好況以一日長聽音爲子飲開樽拂琴牀行息皆歡
歎與子何弗臧冥物嫉尤美殊此天一方殊天各異地清
夜遙相望依膝發浩歌卷袂蒙秋霜豈無雜簫鼓賞會乘
流光豈無解佩交瑁瑁擷芳薺願惟吾與子德音矢共良
人情天所鍾悲樂豈自量贈子一縑絲永治以勿忘

贈陳實菴南岳別墅

南山君子可稱東小障嵐光十畝宮徑待客來雲不扁夢
無塵破月虛權試茗泉沸千尋雨把酒松涼萬壑風閒共

野樵尋唱和錯詢歸路薜蘿中

其二

文衰六代若爲韓謝氏風流只數安可羨一人林下見漫
勞百姓野中看名山覆卷晨來讀流水隨絃倚石彈卜者
得槃且在澗蒼虬嶺背石千竿

之閩

折折山光雨後青無窮蒼翠翳千屏忽移風景朝墮蒼怡
稱森疏薄暮垌怪石險疑驚處落重巒迴復去時停浪游
不負看山興動耳潺湲酒夢醒

其二

何禁客路雨潛潛况瘁征夫步步屨不記去程亭上里驚
聞前險驚中山俯崖千仞雲浮壑夾道雙尋薜若關旅况
兼旬能不惡蓬心如許夢成頑

北行小憩

停車結伴轉林橋信步前峯路不遙剎古自應人徑寂柏
蒼怡稱野風瀟瀟來險壁看如畏探到窮源別有遭斷碣
豕魚相唯否錯將鄉句詰愚樵

其二

怪石巔頭一髻奇，蒙茸瘦若髮禿。仙成石磴行忘曲，禪
借苔陰坐學欹。洞外有天垂一線，俯身無地瞰三齊。倦予
攜手同車晚，明滅霞雲暮影低。

過荏平縣

堞櫓成殃士女凶，亂離寧復彼都容。莫聽笳鼓河山怨，幸
見瘡癍骨肉逢。未許書生談赤幟，誰堪將帥飲黃龍。可憐
壘月荒千里，空照哀魂覓土封。

弔王年兄舉家死難先年兄卒南都任所

鞠躬王事已難言，詎復崑崙災。玉石燔空有文章，新事業不

慙節義舊家門。巢林燕子春無主，痛骨鶻聲夜有魂。知爾
有知能作厲，部分烽火護中原。

路遇難民禿首臞，面跛足縷衣皆被掠。脫歸踵相接

也悲愴慙憤情狀感人卽賦

春楊堤上足蹒跚，驚死疑還帶哭看。可慶得顛猶在項，不
慙無髮笑亡冠。祇存煨壁依宵露，何處遺黎丐晚餐。大地
流荒誰得繪九重，天上一齊觀。

過任邱縣兼弔李年兄遇難

烏棲啞啞城上嘯，不祥猶恍避兵時。兼旬胡火掀天至，一

夕城灰捲地移宿將尊生應有略孤臣除死復何奇不辭
命賤天心菅

未句缺

過琉璃河橋恩慧寺小憩

車騎橋邊綠樹甃夾堤晴蔭護深龕多年蒼柏閒時長永
日黃鶯背後喃佛喜近人隨現象客從何處解停驂到來
且作勞勞坐石畔逢僧欲話慙

其二

萬里迷途一剎開清涼國在熱忙堆木魚聲裏經僧定金
馬門前詔使來流水堤通垂柳渡夕陽家在白雲隈琉璃

橋市琉璃火爲照仙凡咫尺埃

曉行賦志

時年三十有九

雞鳴軋軋曉風清約束征鞍馬上情旬日程兼臣力瘁三
千路遠帝星明撫顏羞影應重甲筮仕須強待一庚許國
願同朝日旭丹圓矢共此心盟

出塞曲

千金裝寶劍萬里逞霜蹄浮生無所是露死寧深非擇吉
不須歷王命無畱期驅車出長安漠漠邊風移同心寡壯
士顧面多重瘕胡草迷天荒敗堡颺虛旗上書報天子司

馬聲訑訑孤臣絕黨援果如吾友譏

其二

烹姬享麾騎攜兒寘路人身命决今夕安知愛與親宰律
動天地萬里聲轟騰氣奪虜勢窮伏變爲紛紜棄馬焉者
山斂畜瀚海津將軍矜命重戰士說官輕所貴在令終無
負燕然銘

其三

墉籍稽先服風俗雜夷華老白旣摧謝少壯生胡家天兵
揚餘威羽騎成豪奢新貴終朝來更法賦以加但覺漢民

苦寧復驅塵沙伺訏乃憂盜欲語聲槎枒壯出願老還功
名豈所誇

恭頌楊明宇都尉入祀擬古十三則

闕宮有恤蘊蘊崇崇于嗟尉侯是赫是宗維侯之生毅宏
其德其德不回降之百福帝曰試哉事之以女以觀其內
亦莫不有維侯之貴貴而克從刑于王姬曷不肅離離離
在宮以媚天子承顏二人式則下土下土之式孝哉維侯
貌無閒言內外孔修颯彼原風淒其棘止睠彼蓼莪永言
慕止天昭令德維侯樂樂願與世辭婉變在原嗟侯之令

德兮都人士之式也嗟侯之與世辭兮羌孺子之泣也瞻
彼高山巖巖其麓有懷哲人在彼空谷相彼淵泉挹之注
之有懷哲人流之溯之載虔我桷載斲我棖載瞻我侯於
我言歸載設我筵載絜我几於萬斯年侯於歸處

贈彰武楊公作

坐君之樹把君之卮感君之情聊以詠詩樹參肆列酒數
十行感君之情聊以短吟蒼蒼者檜濟濟者友其樂只且
君子有酒山高鳥悅水深魚潛故人情親樂不可諉我心
匪石不可與語飲之食之實獲我處膠舟汲水寧非大愚

解衣牽裾曷不共娛功名梁飯韶華鼓歌酒酣夢醒願言
婆娑達人解頤志士奮鬣睠彼賢豪殊途合轍人則有名
草則有芝浮白斫地光聲差差山礪水帶厥惟高風抗言
古人惟公式從

留別浦君虞君

淡月霏微照布衾一牀清切曉風砧有書堪潤相如璧不
操已聆伯子琴悟坐語立都入塵相看氣熱爲抽鐔愧余
浪跡如蓬線珍重依依此際心

其二

倚膝推櫺望曉洲晴光漠漠氣浮浮霞飛奇嶺天孫采瀉
激長風宗子流宿浦老漁多局外嚶聲好鳥已枝頭妒君
浪得人閒瑞大塊文章節次收

答贈友人

客從遠道來贈我一尺鯁中有長相思薦以屈子言晨起
肅手讀氣咽心爲填誦詩論其人想見於簡編黯慘晝欲
晦側耳聲如鶻千秋同有心於今迄耿然不語心自吁愧
我空頭顱三十無所成愴然一匹夫瞠目仰呼空熱血噴
如鬚牀頭差差聲却顧羞昆吾古語不云乎伏櫪猶思駒

乃復俛首吟鄙哉何硜硜昔有華子魚魏富而漢貧汝是
老嚼菹何無肉食心緩頰弱其脊行有哀王孫折竹不畏
風萎草不畏霜醉人不畏醴逐客不畏讒沈水不畏深赴
火不畏揚古來介節人頻死猶弗量失足遂改步如嫁就
木孀千秋固有心亘爲霄漢光永矢示故人珍重加其飨

咏梅

冽擬霜英素擬紈香堪清嗅澤堪餐孤惟枝上更更月韻
在根深九九寒分外有奇姿自老真誠彌勁骨如癡折來
珍重休凡贈不是同人不會看

其二

弗以東君露雨淫知君未肯受恩深幽貞想見千秋色樸
素堪思太古心傲歲自能香蘊藉避人聊獨影浮沈吟成
率爾空歸去慙負詩人不姓林

弔亡友玉芝

陋巷茅茨水裏田一瓢聊自飲清漣知君聰慧應須遜壽
得顏淵一兩年

其二

擊甌攘臂酒英雄會欲鯨吞三萬鍾不道閻君筵李謫過

教牛鬼負詩筒

其三

衰楊落日影離離閒有幽人嚴子磯幸君不遇漢天子客
星自在五湖西

中夜懷玉芝

莫賦山榛與隰苓云思空切美人音不言自省意中事已
解重迷未了心華表能言千載鶴高山誰聽一牀琴酒醒
忽覺生前夢長殺寒更短布衾

其二

交交黃鳥止于桑，
我良人憾彼蒼。
直欲倡予先女，
和那能寒齒爲唇。
亡亦身棄世，
君爲逸奈世營。
身我倍創死，
死死生應共惜敬。
我友在他鄉。
壽完卿先生六十三。
夫人肯不言白首。
皤髮老夫子，
軒冠古達尊。
疏籬處士徑，
種樹先生門。
半郭不爲市，
一溪全遠喧。
琴思發幽籟，
月影吟騷魂。
獨邁千秋氣，
相看十斗言。
說劍逢屠者，
扁舟訪灌園。
浮名安足問，
置意難爲論。
邈矣商山芝，
擷之分朝飧。

哭瀟西臧子瑞徵

癡肥可爲不可爲，
安耐丈夫名。
愚孩聰明可爲不可爲，
不天卽貧罹百災。
哀君壯志斯已矣，
愧我一貧至此哉。
俯首思君痛不盡，
拍手掀鬚笑一回。
閻帝一網盡才鬼，
生憎活者如霜蘖。
驚天富貴味若蠟，
壓世文章形似槌。
不然彭島乘風去，
不然殤墓冢壘壘。
安能不仙復不死，
覩然人面而鬚眉。
白楊秋氣涼，
衰草秋更荒。
下有古哲人，
時與君往還。
君死不爲惡，
我生長大難。
七尺掩君形，
萬斛愁予心。
故人兮，
故人仰面看白雲。

題西來欽廬擬古濁漉篇

濁漉漉灑雨聲下屋子有酒食與子促足颯颯泠泠風高
樹驚子有琴牀與子賡音寂寞子廬巷無還車被短夜長
鼠嚙子書山不在高水不在深人不在貴貴在知心燭光
炤炤爲子舞劍爲子舞劍時方夜半昂昂丈夫赤睛虬鬚
子非庸人請爲子圖呀呀鳴雞子噓我唏星稀下霜子起
我趨前不努力後人將及廬乎廬乎爲子轉側前者不努
後將無施廬乎廬乎爲子躊躇

病慰

猗言留侯爲帝者師沈子無腰偃僂奮時丈夫生世抑別

有奇如彼行賈僦屋而棲古有哲人珠懷褐被顧其精神
不在瘠肥

其二

子之所慎其三曰疾古之神聖弗辭天厄維天之厄伊風
斯雪隨向而著夫甯有擇塞向墮戶是或一術慎之慎之
勉旃勿戚

其三

朝聞夕可甯非至言迨其已聞死那足論厥夕匪怨朝亦
匪恩在天地間貴有所尊一息能延終古勿諼可可否否

靜言自反

其四

七尺必腐原非我得既非我得夫焉足惜繫此性光永不
受劫在胸能紅暎空能碧嗟嗟彼愚徇物是愉有寶弗愛
而愛腐軀性滅斷光若轅失綬有美者軀蟻螻是咀

其五

衰草白楊下無好醜不必苦病而後斯有彭殤同歸奚爭
短久朝菌歲椿孰夭孰壽作平等觀讀消除呪

悼亡友北翔子擬風八章

維東有湖之子之居維南有邱之子之娛汨汨湖之波矣
杳杳邱之阿矣

其二

維東有湖維子之居之維南有邱維子之娛之杳矣汨矣
維之子之沒矣

其三

載泛我湖載陟我邱之子云邁使我心憂如何如何維之
子是求

其四

之子飲酒式和式歌解衣牽車琳琅其珂維余與子則多

其五

豈無兄弟維余與子豈無燕飲爰集朋友維余與子則喜

其六

之子之行亦弗余舍載離寒暑云何其邁之子之食亦弗

我棄獨寐

何其逝

其七

之子鼓琴於前之陵往掄其軫或為高山操或為流水音

維之子是聽

其八

之子築居於陵之隅往坐其除娟娟之月來徐颯颯之風

飄裾維之子是俱

贈何子

并序

何子永瑞髫年俊才也其季與余分席遂得相好

將負笈之邑索言於予以勵行旌余之言曰憶甲

子余與尊大人同行李江上因其左臂偏短故時

弗忘及今余塾北渠里詢其昆季固即其子也嗟

乎已作故人矣數年閒遂易兩世交思之可為浩

歎惟余十一歲喪父迄二十一年間之伶仃孤苦
幾不知有今日自恨燕娛荒溺忝厥所生使予父
飲志泉世每有所觸忽若周身集矛吾子抱英異
姿固迴絕於余倍倍然而熒熒在疚抑有集蓼之
傷則余不勝以自痛者痛子也君子有言務期必
盡惟克承孝無愧先德則予與先大人暨面之緣
亦爲不朽至於取子之歌吾子止須甯耐勿漏介
也同情相悲同志相求不覺其言之激切嗟乎吾
子勉旃我邁而征正我與子今日事復綴俚言志

感且交厲云

有雛東南飛肅肅織其羽疾風拔地寒薦之以陰雨杳渺
前路賒乃復歸何處明發有懷人綢繆徹其土中道資所
志欲陟悲無岵哀巢已毀眈眈又奚取有雛天北來俯
首翼已垂痛此相將情囁嚅復徘徊悠悠者蒼天我生罹
百災如窮歸何所匪莪而伊萊罟之張若天驚魄其已隕
予維音嗶嗶亦莫知我哀載振我之毛載奮我之翮我將
云我邁甯於斯有惜鵬之垂也雲若鷄奚有識搏彼扶搖
風勉子之於役於惟予與子胡俾其所凶有題原上令感

目愴斯中不然爲鳴鶴嗥嗥長空不然爲岐鸞熠熠朝
之桐不然尙父鷹摩雲遡秋風安能弭喙足啄粟依其籠
於維余與子其誰之適從亂曰爰有孤雛熒熒踞踞一年
擷足三年濯羽無恒安處將翔將翔舉空之宇舍旃舍旃
今此下民亦莫予敢侮

傲裘行

午歲裘敝來歸其況蘇季子之所不及兼以沈疴
僅能餘喘貧病賤亦士子之常耳然予每見古人
名哲或遇賞心樂事無不形之歌咏以志不忘人

生能有幾苦樂可使悠悠與年月俱逝復自念天
之通人不苟則其窮人亦不苟某眇少小子顧費
天心如許珍重誠可僥倖因恣筆盡言得二百句
聊見病貧賤不肖負余者余亦不負貧病賤也

歸家裘敝惡一步一停泊黯慘風中色塵不見邨落況以
途路長兼之筋力薄身憊流汗黑無見不驚愕謂當得憇
息新向客中來孱妻迤邐前稚子趨而踣捫足忽失笑天
性多徘徊屬親聞我來相呼出空房親知聞我來蹀躞歡
中堂朱衣何無據抑爾命不康東里有才人文學世無雙

新得薦南都佩履相翱翔西里有少年才名亦類爾開榜
乃得甲羅樽列賓齒相喏各出門聞言乃不嗔嗔極乃復
戚氣咽色若奔進門走榻臥擊落榻頭塵妻前不敢問小
背頻掩巾掩巾巾漸溼滴淚淚漸急嗚嗚如有聲聞聲聲
復吃君今初得歸奈妾心中迫冷煖妾骨肉艱楚妾朝夕
可憐妾孽兒無知但哭泣孽兒嘗苦啼賤妾嘗苦飢妾飢
妾薄祿忍飢入空幃辛苦看君面君面今如灰聞言崩五
中覆面如覆鐘覆鐘縣之簾面覆不可容容而非面大羞
憤徒惺惚有耳不欲聞置之鏞兩傍有口不欲言敗缶罄

斯張忍淚若忍珠涕泗忽以滂竊目視細君垢面灰衣裳
徜徉不肯去乃復倚我牀曲膝枕稚兒慰誘相扶將愁爲
起一笑人生那在飽天有不餐星地有空腹草朱門有白
粟纍纍積於島爲致三千石使爾倉箱繞朱門有黃金積
珠如積困閃爍玳瑁光熠耀羅綺雲爲爾致之歸使爾多
儀容朱門多果栗玉李金爲橘置兒滿襟袖使兒無哭泣
富我囊橐物顧患富相逼出門周四望悵悵何所從叔兮
豈不富硜硜無所容伯兮財帛多顧以阿堵雄擔水注頑
石那得其意通自強還自難憑此三寸功行行叩主人主

人出迎逢問詢無裏詞相顧神色慵俯首自躊躇欲言還
囁嚅如畏如有思煩整裳與裾阿仲良大難鮑伯近何如
主人得聞之不言心自思今那得古人彼時此一時況前
些須意蒙取未蒙與遭此歎穀歲緊我亦無有氓兮何蚩
蚩輒復爲馮婦贏得汗雨歸事與心相非阿婦見顏色含
笑問所期朱門好賓客晏笑多贈遺開我東角門恐有朱
門奚賤妾有營糧椒飴芬斯香晨來初出炊皎潔瀲灩光
君飫朱門膏得未曾有嘗不遺賤妾意聊以供君歡聞言
喜踰望感爾區區腸療我旦夕飢永佩以弗忘願乃出甌

糟雜以不春糠兼之無名草煮此天然湯一咽滿喉喉再
咽如鍼芒稚兒唇若瓶眈日紅兩眶阿婦背面坐自語私
自傷昔有花似孩三載二尺長秀慧貌無比每食居我傍
預知此食艱先我歸北邙此兒孽深重受此宿世殃君是
美丈夫慷慨坐糴糴那處不適意乃復戀妻孥秋風聲颯
颯漸覺肌生粟晨起四周望楓紫衰楊白檐前雪似肱單
衫垂以結更有執券豪見面如見逃張目厲於虎掀唇髭
若獠話以腑腹情猶以水沃焦絡繹織我前枝上吟風嘯
連夜浸敗屋狂飈吹腐舟浮沈半生事激烈一身愁我心

匪石金刺以萬柄矛懸以斯奔鹿澆以百沸油敗絮擁惡
寒惴惴如獼猴命繫風中絲聲聚波上漚昏憤一無聞惟
聞兒女啾雞骨立若柴蝟髮枯於糾中夜念先人式我以
穀似讀我聖賢書明目而聰耳貽我嘉兒婦甯非冥所恃
慷慨命男兒三十無成矣着我鼠腹巾懸我鶉甲衣拂我
生時弧烹雌炊我屨丈夫寧虎瘠奚惜羊而肥出門須仰
笑戟戟掀鬚眉囑妻姑勉旃無使稚兒啼

遊定山珠泉唱然作

定山諸峯翠攢疊閒有清泉下奇壁或隱或現來重冥流

出人閒天地珍天珍地藏非人有曩者如貫圓如走離合
變忽不可方是耶非耶稱夜光非耶萬斛宛在水映空空
明澤自媚是耶一泓遠世情游魚綠荇相繽紛碧玉波紋
玲瑤草芙蓉渠倒出珊瑚島日觸手倚皆琳瑯貧兒悞入龍
宮藏慚予悟道苦不力對之可貪不可卽粒粒顆顆幻作
圓對之聊以澹吾耽沁人心骨照人面出人想像當人見
化工何巧人何騃探崖網海胡爲來吁嗟兮掬水得珠兮
珠在手覆珠入水兮水聲溜珠流不竭兮水無心流水無
心兮水與人俱深

答陸四五言古篇 有序

予與陸子歌泣於敝裘有年矣惟予徹骨爲貧而
陸子數奇有迫膚之坎顧予性慙不知此中痛癢
爲傭爲乞俱以慙行陸子慧乃未勉憤也甲歲予
着屣歸來復傭於葵秋夜涼寂闕然懷人起讀陸
子札兼其見遺咄哉篇雖任意爲詆終多懣意造
物之窮達人俱非易易我輩今日能則爲達人之
任運不能亦當爲志士之益堅目前境遇甯供爾
我詎懣之資而已因擬古見志兼以示廣云

秋夜起危坐誦君前日書開書見君顏拂拂君裳裾願書
對君笑明月窺窗虛書中何所有長憶聲低徐告我中夜
腸趯趯掀眉鬚愴哉丈夫志願作書生迂身大天地窄安
所願頭顱二十載竹笠二十驅牛車相逢不須揖同路行
次且踏歌風埃中招手羣椰掄二女不相得惡知志所居
願言思古人強哉矯不渝一介亦懾息進取不忘初世外
有得失故中無戚愉抱甕朝出汲曝日患苗疏雖無三百
厘聊以餐吾劬如彼宋人拙終弗忘其株夢鹿而覓蕉安
所張而虞握粟卜云吉永佩之前踞攜手出北門涼風旣

亟且彼世何可測我好惟從余散髮步中庭自謂還自諛
人生貴適意輒復爲區區肅函跪故人搔首而躊躇

題西來小像

時西來懸一小照便服角巾坐虎臂上旁一奚兜
整捧劍厥狀殊武浮大白而題之

以爾爲書生爾何陪胄而侍兵以爾爲武人爾何白面而
烏巾爾之有言固將縱武而橫文也乃人之謂爾得無謂
一劍之不足任而八股之無其憑然予之謂爾則不於形
而於神不於成而於能夫然而爾之亭亭英英倚劍而長
予用是促膝而前於爾曰屈指當今惟有使君

可拈髭而苦吟豈徒是舌上之管樂而戶內之韓陳也哉

全集卷九終

邑後學 宗心澄丹卿 重校

王湛佑臣

堵文忠公集卷十 詩集

宜興堵允錫仲緘著

廬次哀吟

築廬

築土何堪四壁環
結茨差得障空山
徒深昊德彌身痛
猶辱君恩屈指閒
圮石蘚文經雨躡
欹崖薜影遡風孱
荒原日盡求何是
拭淚寒林萬葉殷

設主

本天本地各為親
痛莫呼搶子爾身
藉用白茅恫是主
憑

增文忠公集卷十
將篆字怨通神居歆應自勤
棖桷温清虛期計夕晨四顧
空宵增怵惕一燈瘦影自逡巡

日盡雨雪

凍雲橫樹亂山隈無數陰風動地回
豈是瓊華稱物瑞直疑縞素感予哀
空山入夜霜先落十月應春寒早來
號血喫空彌作碧荒邱擁篲獨聲摧

禮懺

稽首南無禮法王自訝儒者世人狂
雙幢瑞降荒原白寶磬聲依古柏涼
資冥豈能來幻福虔心聊懺宿生殃
皈慈

跪聽喃喃祝一縷哀魂篆燕香

築坐

負畚擻衰手自据意中堂構肯予除
析薪作爨聞呼荷築障當闕見倚閭
松夜或來留鶴蹟壘雲無恙泣憐孤
一坏不可悠悠問泰岱頽難益以墟

晨謁

惕惕霜風裂指酸卷衰踣步泣痕癢
終天極望孤雲溼坏土哀聽萬木乾
明發有懷徒念昔省温無處獨支寒
香升應不居歆遠辛苦熒兒拭涕看

丹崖返照入霜楓，覆壁山光大。地容踏踏何之荒，徑晚皇
皇如聽墜林風。徒切見羹思所嗜，或憑在帝降於壘。長跼
孤兒生萬感，寸心淒絕暮雲鐘。

夕奠

聞雁

蒼崖岑歷夜風清，欹枕松聲過雁聲。萬里遐征寒已暮，四
更孤唳月初橫。豈能陰鶴將雛和，應擬原鴿賦急鳴。最是
棘人聽得盡，支癯無奈獨爲情。

習射

坼裂驚飈倚壁崖，角弓初勁奮吾儕。反予子鵠愴何及，隗
爾王仇願與偕。禮樂比躬君子物，桑蓬懸始二人懷。敢將
一矢盟初志，當道何人問臥豺。

至日

六盡陰根動一陽，天心於復見眞藏。萬靈此息包元化，鮮
我何誠格帝蒼。美報敢違云禮樂，拙哀祇是泣風霜。掩扉
日覺親恩永，課讀遺編一葉長。

誕日

重逢八日酉初晡，一脈靈光墜孽軀。自此親恩靡日夕，不

堵文忠公集卷十
成子道屬斯須許草豈望酬如吳拆副先甘備百劬喜動
二人頻拊復看兒肥笑一身癯

其二

與齡猶憶夢中辭一步句峯禱孽兒直辦至誠移大造豈
期幽應促遐禔慧業已賁先子恨荒遊重誤牧人期有生
曷似無生已悔錯從來路已歧

撫松

蒼虬百尺倚崖空空律濤聲氣接穹千載月華留去鶴長
天霜落過孤鴻仰喬知蔭悲何施俯梓空慚寥者蓬欲靜

豈能償木恨狂風盡日暮林童

寒日

負棘歸薪山徑昏斷崖猶自惜孤原萬形具肅聽虛籟一
魄初懸靜夜魂魚艇隔崖連火東棲烏護影各枝繁淒清
不奈寒苦度匡坐長宵對短垣

除夕

歲迫青陽屈指臨撫懷時與事俱深莫憐已往等閒度猶
惜殘宵未盡心愛日豈能追夙昔終天徒自愴於今陰風
闕寂哀山鬼嘯入疏櫺助短吟

元旦

樹隱山家爆火聲
攬衣聽曙自孤清
旭涵萬象皆新氣
霜凍寒廬無限情
肅我衣冠靡出至
僮子几俎待思成
矢將昧旦除前夢
痛負眈眈日在冥

夢感

荒蕪杳渺碧雲灣
感入重幽咫尺閒
卻憐兒長峩新弁不
謂親違猶昔顏
照我鬚眉今古在
昭茲志事沒存艱
驚魂斷續憑風度
掩泣淫淫天地斑

遺編

肅手晨來誦素書
心光隱隱映盈裾
儼然入戶如親炙
聞爾趨庭或命魚
努壯將何行未逮
學優虛待仕方初
照顏古色今猶烈
敢負當年語女居

夜懷

負我長心短髮搓
半生虛歷夢中跚
一期未補年成壯
已暮空爭夜若何
身世日艱更事曉
邁征無似忝生多
聽歌起和雞聲切
撫枕猶雄待旦戈

寒食

空郊晴望不禁煙
屈節驚心二月天
墓壁陰風哀此夕
薜

蘿虛月照經年一孟解祀仁人粟陌紙愚飄冥地錢渺渺
愁予何得繫西風吹線夕陽鳶

忌辰

悟徹朝聞道已尊可將此夕謝虛煩啟予知免生平志傾
耳猶溫簣上言三尺藐諸兒勿棄九原作也此俱存標心
有涕無窮恨伫望殷殷白日昏

其二

焚香伏酒誦遺辭萬刺吞心痛莫支思孝永言深薄句移
中矢切影衾時丹衷未暝章爲漢古道於昭鑒若茲二十

七年憑一刻紹庭猶自儼予趨

瞻雲

配巔帖脊竟何求色笑如親悵末繇父曰勉旃兒勿惰母
摩瘠矣子罹憂杜生已杖誰憐躑芑仕茲貽若自謀仔我
一肩歧路立悠哉未艾白雲浮

桐華

壟有枯桐禿矐已久忽滋春兩旋復勾芽於眾卉
中陰森獨茂已傾而裁有培無覆元功之澤比我
無疆感而成句

孤根瘁也隕而童分棄嚴霜栗栗風詎意天心勤篤物不
偏春氣到枯桐十年計樹先人澤一旦回榮孰者功好護
新枝勤自漑彩雲留待碧鸞封

聞鵲

驚聽咽咽夢初回撫枕呻吟杜宇來子夜數聲回北極親
恩無計誦南陔已賫蜀恨彌今古豈向隴中唁草萊掩血
窮歸何是所披衰子影立蒼苔

風雨

急崖危石水淙淙浸入匡牀滿壁蓬一夜孤愁難聽雨連

旬花信可憐風覆顏賸有黃鸝蔭拭涕殘無杜宇紅藥餌
資身看計拙荒厨蕭澁暮煙空

至日

東風原上草深肥翠木交陰欲溼衣駒隙韶光日復永車
輪消息妬初微感葵知向悲漫夜窺燕思哺望莫歸大地
敷榮憐獨瘁支離顧影共斜暉

永日

映窗書色綠分蕉山樹無人急午蜩讀禮知虧誰體髮誦
詩悲羽已譙翛空支永日勞人瘁莫贖無辰孺子焦胡我

鮮民寧獨忍荒庭徂暑滿蓬蕭

辭墓

捧讀嗚嗚拜主辭三時轉盼百年悲空搵子怨無窮涕猶
是臣身此刻私莫德匪親天共承何能事父敬堪資矢將
兩字先人緒出處靡治亂若絲

其二

朝於原望夕於邱已習陰風思與悠山鳥解啼號旻句白
雲熟向草廬浮庭筠看長新秋陰陵月虛聽靜夜坏已絳
兒心松上蔦不成飄梗復乘流

馬革集

公嘗聚軍中所賦詩名曰馬革今集逸存詩四首

軍謠十首有月家鄉馬兒女筆先鋒
血筵席營十殿諸題見永歷實錄

過新化驛

按年譜丙戌春調各營兵復荊州不克師還由澧

水駐武昌憂憤嘔血幾死過新化驛題詩

不眠燈火暗孤邨風雨蕭蕭雜夜魂鬼定有知號漢闕家
於何處弔荒原三更烏化千年血萬里人悲一豆恩北望
諸陵迷野渡鍾山腸盡可憐猿

其二

短策回瞻城曲陰，劍聲猶吼不平心。
孤軍雨裏聲音死，亂水橋邊馬影深。
南北試看誰世界，死生此刻辨人禽。
倒翻廿一廳前史，正氣千秋歌到今。

過天門山

屬岳州府慈利縣山，凡三十六峯，最高者曰天門，門兩向各有一竹倒垂，下拂俗名

天按年譜：丁亥八月，常德陷，公乃率諸將駐劄永順，保靖二土司界上，待時規取。十二月，復常德，進復辰州。戊子三月，過天門山，題詩。

亂裏看花試一臨，廿年零落又春深。
柳桃盡入兵戈眼，溪澗爭鳴風雨心。
野鳥向晴三月麗，峽猿愁絕暮山陰。
天涯卽事渾傷舊，馬背鬚眉自感吟。

安仁道次

安仁縣屬衡州府

戊子十二月，公督兵援江西，至袁州。己丑二月，聞湘潭陷，公聞變，還救已不及，乃拒守衡州。二月，過安仁道次，乃作此詩。

終年馬背隨風雨，盡日刀尖度死生。
全副骨頭貧裏赤，一雙角眼老難青。
才淹騷賦非傷主，學竊春秋未解兵。
四十

八年心事在敢云多難獨精神

主學錄春林未開是四十

平調清湖風斷盡日天與天全隔骨瘦黃髮

交才後天

交才後天

交才後天

交才後天

交才後天

交才後天

雜著九首

答鄭又日詩

透溼青山泣路難灘橫石出水先乾
一生心事誰同執半夜雞聲獨聽寒
風落沙頭征雁碎雪飛燈裏客衣單
聞輦聖主方勤楚把鈞王孫孰飯韓

其二

萬馬中原孤路賒亂山落日一聲嗟
方爭集苑誰瞻屋可歎怡堂誚喪家
復楚包胥何向哭傷魂杜宇滴成花
途窮那免泥中怨瑣尾羈棲風雨斜

其三

辛苦篙師費往還多愁知已重愁顏只今天地干戈裏自古功名朋友間雪夜捉刀爭向蔡尊前聚米忽成山同仇莫賦無衣句投筆何人事玉關

宿菰州僑居有感

此詩見無錫縣志

湖山不改舊風流萬頃波光照荻洲聽我好禽當日句懷人芳草接天愁半生蕉葉難為夢一樹梧聲忽到秋大笑開顏原不易傾尊莫負故人留

謁宋張先生祠

猶見先生宇鬼然古刹前勿深同異辨翻藉磬鐘緣棟落陰晴雨費飛晝夜泉相期今在昔迴戶厯星懸

戰城南

美濟寧之守也胡騎屠掠燕齊以南無完邑濟鳩孱以守彈葦屹如過而壯之用紀其事

戰城南古來殺賊尙戎馬今時殺賊依城垣胡兒蹀躞城之下死城北古來死敵矛與槍今時死敵只蒙首如山萬眾奔踉蹌黃金帥印肘如斗戰功還數濟州守濟州不藉餉與兵官民一心雙赤手天開豺犬重關來屠城掠市如吹灰旬日長驅四千里慘黯孤月重紅圍壯士噴血怒切齒驕虜竊竊語相視四入中朝不見人一時相向者誰子

虜騎無多倚若神
踵肩肉薄蟻城陰
一擊斃虜虜氣奪人
命方知互死生
壯士斷髮吼如虎
安能巾幗爲新婦
三尺寶刀比虜長
腰間羽鏃各堪數
回人西種來流沙
衣被皇朝十萬家
身無官爵口無祿
西來異氣聲槎枒
更有郵兒髮初結
倒提白棒皆欲裂
碎劈胡腦如劈瓜
千羣鐵騎齊辟易
戰城南壯士悲
鼓轟旗颯朔風吹
醜虜殺人如刈草
不惜生與同時地
同時同地胡生爲
死城北壯士樂男
兒志骨會有託骨委
溝壑狐狸食沙場
時見陰風作志氣
直欲貫長空爲河爲
宿光迴薄殺氣直
雲雲不飛角聲動地

河山移壯士斷頭戟
不仆驕虜狂奔馬
不嘶倚蓋欣逢父
老說此是城南鏖
戰窟靜夜時聞鬼
戰聲壯鬼逐食胡
鬼泣君不見濟州
壯士戰城南索食
不問身索飯不問
官朝廷養兵百萬
皆糾桓征賦東南
髓肉乾又不見濟
州壯士死城北生
不貪人錢死不貪
人哭中原百萬白
骨莽如鏃若箇邱
山若溝瀆

哭江行

蔡公道憲爲長沙司理張獻忠陷長沙道憲死之
崇禎十七年三月公復任長沙登憶江樓哭之併
哭一時同死之人作哭
江行樓在道憲祠左側

江水湯湯江影黃使君三度哭湘江初哭江流水欲竭再
哭江流水盡赤孤城萬里揚孤帆三哭湘江三斷腸長聲
漫兮短聲續爲鳥從頭仔細哭有客有客余將軍張弓逐
賊大虎坪手刃七賊身劈裂山頭白日催雲昏我友我友
江門子黑鬢頽身好司李三年冰雪府琴堂嘔盡心肝民
屋裏一朝劇賊和江吞十萬戶變魚蝦羨南朝侍郎惟一
蔡北面兒曹重見人口噴罵賊賊不了賊不殺公公獨惱
千秋正氣坐跨箕五丈原頭星照草劉公劉公爛繡衣月
暈孤城雞夜啼撥刺陣前馬腳失差牙枝上鳥腸飢蘸血

祝筆筆不語萬段肝腸數行字惶恐零丁灘與洋再拜君
恩臣萬死三復馮君辭祖篇兩耳不全兩者全生歸拜母
死罵賊死死生生作孝廉西寧邱令死不變厲鬼塚邊憐
夜看三十六灣楊令哀泪江千載今重開李幕吳丞今已
矣一名完眞一士義名從父命士從君舍身成名君兩人
歸然赤幘者誰子半日泥塗扶不起更有關心全化賊肉
食儲君前獻食接天江水奔滔滔盡日陰風長怒號作書
筆力愧南史欲斬書生無寶刀吁嗟乎長江流兮清復渾
清者如君濁者腥江流萬古同清濁哭斷歸來兮誰醉醒

遺詩失題
何物清人心淡淡花閒趣持繚覓異本藝植遶成路曲折
不可尋香氣積如霧夜來溪澗聲長是蛟龍護

題某像

子客遊履雲間水閒胡來而蹲斯抱膝焉其耽咏以天籟
或取觀于濠澗嗇子襟耶注萬斛之秋水脫子穎耶寄片
楮之壺天破聽黃鸝再夢期白社忘言若千古而會心許
蒙莊以無筌猗嗟吾烏夫子意者任魚之躍爾而與鳥俱
翩然

墜龍騷

甲申之變維裂柱傾哭踊無序矧中篇律墜龍騷
者孤臣野哭至尊不敢質言變也楚臣楚聲寸腸
絕矣凡五章

龍墜天兮噫血其元些蛇靡歸兮噫涕其漣些匪兕虎兮
噫率荒原些獨瓊尾兮噫步躡顛些
天卒躡兮噫龍不升些林方燎兮噫蛇屈伸些陸何沉兮
噫神州崩些慘何黯兮噫雲霾昏些
龍有神兮噫去不歸些蛇有骨兮噫死不屈些神不歸兮

噫倬雲回些死不灰兮噫闐火哀些
升彼岡兮噫山虎偃些涉彼江兮噫水蜺長些龍不歸兮
噫百靈猖些蛇曲屈兮噫中道僵些
龍何在兮噫天之北些蛇何求兮噫不越屋些北有蝮兮
噫螫我角些屋有輶兮噫拄我腹些

縫甲泣三章佚一

甲申八月補兵黃州媿臣面之猶生痛國仇之未
復爰命匠氏製我甲裳衽起中夜不能成寐作縫
甲泣

臣官兵馬監枕戈不旦中夜天臣逢四七期二百八十年
數齊臣備古黃邱烽火接地天風愁四野龍鬪蛇失窟一
旦君亡臣尚活臣活何爲肝膽裂臣冠泣作囚臣活長掩
羞掩羞不掩泣惻惻衣衫血噫嘻吁泣血縫甲翦落聲著
甲著甲先著心好向原頭哀處尋

莫縫甲縫甲賊識我勁鏃長矛不得躲莫縫甲縫甲身逐
賊生吞死厲相迸急何年洗甲瀚海邊光銷爲日開重煙
臣生不逢涕淚漣臣生有骨骨如鐵生耐金革尖頭雪霜
寒不耐綺羅著身兒女熱泣復泣兮縫復縫半夜長歌起
北風

全集卷十終

邑後學

周恭壽義人
王琮益卿重校

